

ASO LUA, 23 AOKUSO 2022

Na nofoia e le Fofoga Fetalai le Nofoa i le itula e 9:25 i le taeao e tusa ai ma Polokalame o Fonotaga a le Palemene 2022/2023.

Tatalo.

FOFOGA FETALAI: Ou te faasilasila atu ua amatalia nei Taualumaga a le Fono Aoao Faitulafono.

A o le i tuuina atu Isi Faasilasilaga a le Fofoga Fetalai, e ao lava ona asamua se leo o le Nofoa leaga e faigata le mamalu o le Palemene a le atunu, i le afio o lau Afioga i le Tamaitai Palemia, afio lau Afioga i le Sui Palemia, afifio a outou Afioga i Minisita o le Kabeneta, tainane le afifio o Afioga i Minisita Lagolago. I lea Itu o le Maota, le afio o lau Afioga i le Sui Taitai o le Itu o lo o agaia le tatou Malo ma le mamalu o sui usufono uma o le Palemene.

O le viiga e foi ma tumau atu i le Atua ona o Lona alofa ua mafai ai ona tatou toe feiloi i le manuia e faaauau le tatou galuega. E faatalofa atu ai i lenei taeao. E talitonu foi e i ai nisi o sui usufono mamalu ua tatou le mafuta i lenei taeao ona o gasegase o le tino, tainane tuatuagia le maalofia, ae faapea foi usugafono o lo o auai atu i Fonotaga faava-o-Malo. Tatou talosia i aao tulituliloa o le Atua e malutia ai lo latou soifua.

Le paia i Ofisa Sili o Pulega o Matagaluega ma Faalapotopotoga Tumaoti a le tatou Malo ua mafai ona tatou mafuta i lenei taeao, e faatalofa atu lau Palemene, malo le soifua manuia.

I le faafofoga tapuai mai a le atunu i ona tafa e fia i lau Afioga i Le Ao Mamalu o le Malo ma lau Masiofo, lau Afioga i le Sui o le Fono a Sui Tofia ma lou faletua, le Afioga i le Faamasino Sili ma le mamalu o le Faamasinoga, le paia i Aiga ma Tama, Tama ma Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Le paia i Faauluuluga o Ekalesia Kerisiano e fia i Samoa ma le aufaigaluega totofi o le Talalelei, ma Samoa uma o maimoa faafofoga mai i itu e fia o le lalolagi. E faatalofa atu lau Palemene i lenei taeao fou. Ia i ai le agalelei o le Atua i si o tatou atunu i feau ma galuega o lenei aso.

ISI FAASILASILAGA A LE FOFOGA FETALAI

1. **FOFOGA FETALAI:** Ou te faasilasila atu i le paia o le Fono Aoao Faitulafono, ua ou taulimaina nei le Faasilasilaga mai le Vaega Faaupufai o Pulea le Malo, e aloaia ai le tofaina o le '*Afioga ia Tuimalealiifano Vaaletoa Sualauvi II*' mo le tofi, O Le Ao o le Malo.

E tusa ai ma le Mataupu 18(5) o le Faavae o le Malo Tutoatasi o Samoa, ou te faataatia lenei Faasilasilaga mo le tofaina 'O Le Ao o le Malo', i le Laulau-a-Fono a le Palestine.

O le Mataupu 18(1) o le Faavae, o lo o aiaia ai le tofia e le Fono Aoao Faitulafono, O Le Ao o le Malo, i le faia i luga o le fautuaga a le Vaega Faaupufai o Pulea le Malo.

FOFOGA FETALAI: O lea ou te tuuina atu ai le Fesili i le Maota e faapea: *Po o le a faamaonia le Faasilasilaga e pei ona faataatia nei i le Laulau-a-Fono mo le Tofaina o le Afioga ia Tuimalealiifano Vaaletoa Sualauvi II i le tofi, 'O Le Ao o le Malo'*.

Na faamaonia le lafo ma aloaia ai le toe tofia o le Afioga Tuimalealiifano Vaaletoa Sualauvi II i le Tofi, O Le Ao o le Malo mo le isi 5 tausaga.

FOFOGA FETALAI: Ia, o le avanoa lenei, ou te tapa ai ma le faaaloalo lau Afioga i le Tamaitai Palestina mo lau Saunoaga.

Afioga Hon FIAME NAOMI MATAAFA (Palestine): Ua alafai mai lau Afioga i le Fofoga Fetalai ma le Maota o Samoa i faguga lelei i lenei taeao fou. E faafetaia ai le alofa ma le agalelei o le Atua ua taitaiina mai lo outou soifua ma lo tatou ola i le lagimama ma le soifua lelei i lenei taeao fou. O se aso foi sa atofaina mo le faagasologa ma le faaauau o galuega a le Palestina o Samoa. Ou te faatalofa atu i lau Afioga i le Fofoga Fetalai ma sui usufono mamalu uma o le Palestina, malo le usufono, faafetai le faamaopoopo mai i le tatou galuega i lo tatou valaauna.

Lau Afioga i le Fofoga Fetalai, o lea faatoa mavae atu se tasi o galuega taua e faatino e le Palestina lenei o le faamaonia lea o le Tofi o Le Ao o le Malo i luga o le fautuaina o le Palestina e le Vaega Faaupufai o lo o tulai mai i le Malo ma tauala mai i le Nofoa o lau Afioga i le Fofoga Fetalai, lea ua faataunu i lenei teaeao. Ou te faafetai atu i le Maota i le lagolagoina ma le tauaveina o le fautuaga ua taatia i luga o le Laulau-a-Fono e faapea ona tofia le Afioga i le Tama a Aiga, le Tama Tauaana e faaauau pe toe umia le Tofi o Le Ao o le Malo mo le isi 5 tausaga i Nofoaiga ua faapena ona faatulagaina.

Lau Afioga i le Fofoga Fatalai, e fia fai lava sau upu puupuu e tusa ai ma le taua o le galuega lenei, o le filifilia o le tatou Ao o le Malo. Ma e taua foi mo le talafaasolopito le tatou toe tepa i tua i le faatulagaina mai o le Tofi o Le Ao o le Malo, aemaise i luga o Tulafono ua aiaia o le Tofi o Le Ao o le Malo ma le faatinoga mai lea taimi i lea taimi, seia oo mai lava i lenei taeao.

Lau Afioga i le Fofoga Fatalai ma le mamalu o le Palemene, o le tapuaiga foi a le atunu i ona tulaga faalupe o lo o faafogafoga ma nisi foi o lo o mafai ona tatou faatasi i lenei taeao, o le Tulafono o le Tofia o Le Ao o le Malo, ou te tautala i le tulaga lautele i agavaa. Muamua, o ai e agavaa mo le Tofi Ao o le Malo. E tutusa lelei lau Afioga i le Fofoga Fatalai le agavaa manaomia o le Tofi o Le Ao o le Malo ma le agavaa manaomia mo le sui usufono o le Maota Faitulafono. O se tasi lea o aiaiga faavae o le Tulafono o le Tofia o Le Ao o le Malo.

I le amata mai o le Malo Tutoatasi o Samoa o lo o aiaia i le tatou Tulafono Faavae, na tulai mai ai o tatou Ao Soofaatasi, o le Susuga ia Malietoa ma le Afioga ia Tupua Tamasese, o Ao Soofaatasi. Ma o le aiaiga o le Tulafono i lona taatia mai, e umia e i laua Ao Soofaatasi le Tofi o Le Ao o le Malo se i afu lo la soifua. O lea tatou te manatua, talofa! Na vave tuumalo le Afioga ia Tupua Tamasese i le tausaga na sosoo ma le tatou Tutoatasi i le tausaga e 1962, ona faaauau ai lava lea e le Susuga ia Malietoa Tanumafili le Tofi o Le Ao o le Malo seia tuumalo.

I le mavae atu o i laua o Ao Soofaatasi, ona faapea mai loa lea o le Tulafono Faavae, o lē o le a tofia e avea ma Ao o le Malo, o le a faia i ai le filifiliga i auala e pei ona tatou faatinoina i lenei taeao. Ia, a o le faaiuga lava ia e fai atu i inei i le Palemene. Ia, na i ai nai suiga i le faatinoga o le filifiliga lea, lea ua tatou oo mai ai i le taeao lenei ma le auala na faapea ona faatino ai le Tofia o Le Ao o le Malo.

Lau Afioga i le Fofoga Fatalai, o le isi la aiaiga mo i latou e mulimuli mai i Ao Soofaatasi, o le a le toe tuuafuina le Tofi o le Ao o le Malo, a o le a galue i lalo o Nofoaiga e tai 5 tausaga, ona faapena lea ona sau ai. Faapea ona tofia Tupua Tamasese Efi e 2 ana nofoaiga e tai 5 tausaga, ona sosoo ai lea ma le Afioga ia Tuimalealiifano, lea ua maea lana Nofoaiga 5 tausaga muamua.

Ou te faapupula lau Afioga i le Fofoga Fatalai ma le Maota, o Nofoaiga e tai 5 tausaga. E i ai nisi o suiga o le Tulafono Faavae e faasino i le Tofi o le Ao o Le Malo. O lea e matau atu i le tausaga e 2019, na i ai ni suiga i le tulaga o le Nofoaiga, lea e 5 tausaga. O le suiga lea ua faataatia mai ai, ua faatapulaa Nofoaiga a se tagata e toatasi na te umia le Tofi Ao o Le Malo i le 2 o Nofoaiga. O lona uiga, ua le mafai ona sili atu i Nofoaiga e 2 ona umia e se tasi le Tofi Ao o le Malo.

O le 2019, na i ai foi nai teuteuga e faasino lea i le faalupeina o le Tofi o le Ao o le Malo. O le faalupe sa ave i Le Ao o le Malo e faapea; ‘Lana Afioga Mamalu Le Ao o le Malo’, ona sui mai ai lea, o le faalupeina o le Tofi lea o

Le Ao o le Malo. O le a le eseesege? Lau Afioga i le Fofoga Fatalai, ua aveese le upu mamalu.

O le isi faaopoopoga i luga lava o faalupega, ua le toe tauaveina le upu Masiofo e faasino i le Faletua po o le Toalua o le Ao o le Malo, a ua tauave le faalupe po o le upu Faletua. Lau Afioga i le Fofoga Fatalai, o nai suiga lata mai lea i le tatou Tulafono lea O Le Ao o le Malo, o le faatapulaa o Nofoaiga i le 2 Nofoaiga ma le suiga o tulaga o faalupega mo Le Ao o le Malo ma lona Toalua.

Lau Afioga i le Fofoga Fatalai, o le Tulafono lena ma o lea foi ua tatou faatino i lenei taeao. Ae ou te fia tautala puupuu i le faatinoga na sau ai le filifilia o tatou Ao o Le Malo. Ia atonu o lea e manino le filifiliga o Ao Soofaatasi, na fai lava i le finagalo o le atunu i totonu o le Fono Faavae ma faapena ona aiaia ai e tauave e Malietoa ma Tupua Tamasese o Ao Soofaatasi seja afu o la soifua.

Tama a Aiga. Tatou see mai ina ua mavae Ao Soofaatasi ina ua tuumalo le Susuga ia Malietoa, tofia ai Tupua Tamasese Efi, 2 ana Nofoaiga o Tama a Aiga. Sosoo Tupua Tamasese Efi ma Tuimalealiifano, lea ua maea lana Nofoaiga muamua. O ai? O le Tama a le Tauaana. O le a le feau o le faatinoga lea e momoli mai mo tatou i lenei taeao? O lo o i ai pea le silasila taulai a le atunu e tauala mai i a outou Afioga i sui usufono o itumalo, o lo o faaaloalogia pea Tama a Aiga. E ui e faapea mai le Tulafono, o le agavaa mo le Tofi o Le Ao o le Malo, e tutusa lelei ma le agavaa o le sui usufono, a o le a le faatinoga? O le a le mea lea e momoli mai i le faatinoga i augatupulaga ma Nofoaiga a le Palemene lenei i le faiga o ana filifiliga o le Tofi Ao o le Malo? O lo o ave pea le vaaiga mo Tama a Aiga.

Ma i lau Afioga i le Fofoga Fatalai, atonu e le tulaga ese ai foi se vaaiga a le Malo i lenei vaitau i le tulai atu o le Vaega Faaupufai o le Faatuatua i le Atua Samoa ua Tasi, sa faapena foi le filiga e tusa ai ma avanoa ma aiaiga o lo o tulai mai i le Tulafono ma le fai silasila i le nonofo ai o Samoa ma le faafesagai o Aiga ma latou Tama, o Tama ma Aiga, ma le Faleupolu o Tootoo o le atunu, tainane Samoa o lo o faapea ona tapuai mai i nuu mamaao. O le vaaiga lena a le Faigamalo lenei, e pei ona faataua i isi foi Nofoaiga, ma le tausiga o le nonofo ai o Samoa i lo tatou vafealoai ma le tatou tausia o le mamalu, e le gata o le Tofi o Le Ao o le Malo, aemaise o le mamalu o Samoa i ona tulaga faalupe.

Ia, o se matou faamatalaga lea lau Afioga i le Fofoga Fatalai, tau ina momoli atu ai le agaga o le faafetai a le Malo i le lagolago o le Maota i le lafo ua faapea ona faatulai mai i lenei taeao.

Ma e fai ai au ma sui o le Maota e tauala atu i le Nofoa i lau Afioga i le Fofoga Fatalai, e molimoli atu ai se faamanuiaga i le Afioga i le Tama a Aiga ia Tuimalealiifano mo lona valaauiina i le Tofi o Le Ao Mamalu o le Malo.

FOFOGA FETALAI: Faafetai. Ia, malo malele i lau Afioga i le Tamaitai Palemia.

Tofa Hon Lauofo Fonotoe Nuafesili Pierre Lauofo (Sui Taitai o le Itu Agai): Lau Afioga i le Fofoga Fetalai o le Maota...

FOFOGA FETALAI: Ia, o lea ua matau atu o lea ua tulai mai le Afioga i le Sui Taitai, ia o se avanoa lelei foi lea e te talifuaiteau aua le malelega a le Afioga i le Tamaitai Palemia.

Tofa Hon LAUOFO FONOTOE NUAFESILI PIERRE LAUOFO: Faafetai. Ua maea ona e sulaina paia o le lagi i lenei taeao lau Afioga i le Fofoga Fetalai, aua lo tatou vatapuia ma le tatou Matai Sili i le Lagi, ia fai lena mo tatou, faafetai. O paia foi faaifogata o Samoa, ou te talitonu lava ua taoto, e leai foi se tautai e toe fagota sagolegole i ai, Ona faapea lea o so matou leo, taalolo. O le Tofi Ao o Le Malo o Samoa, o le Tofi e faamemelo i ai so o se Samoa. O le fua taualuga o le tumutumuga lea o le Malo ma o tatou tagata lautele.

E momoli atu le faafetai i lau Afioga i le Palemia i lenei taeao ma le lafo ua faatu. Sa tapuaia po o fea a taunu i ai le faatofalaiga, peitai lenei taeao, o lea ua faafogata maua le Maota ma Samoa o lo o faafogafoga, o le tofa ua ae, o le tofa tatala, toe faaaauau le isi 5 tausaga o le Nofoaiga a le Afioga i le Tama a Aiga, Tuaana Tuimalealiifano. Sa tapuaia e Samoa o la faiva ma le Afioga i le Masiofo i lena 5 tausaga ua tuanai atu. O le ala lea o lo matou tulai atu, e faaleo se faamalo ma se matou faafetai, faamalo le tautua Malo, faafetai le alofa ia Samoa. E le galio le lua taimi i le tauave mamaluina o le Tofi o Le Ao o le Malo ma tausi mamalu le Faavae o le atunu.

E momoli atu foi le faamalo ma le faafetai i le Afioaga, le paia i le Aiga Tuaana, Galuefa, Tagata o le Vavau, le Tula o Salogo ma upu ia te oe Falelatai. Faamalo tautua tupu, faamalo le faaeaea i la outou Tama, o le Tama foi a Samoa, aua o Samoa o le Aiga e tasi. Ae talitonu, e le i faigofie le folaua. Ma so o se tofi lava maualuga, po o fea lava, e i ai lava le taimi e feagai ai ma fita ma faigata. A o a ni mea na tulai mai foi i na tausaga ua tuanai, ia ua uma upu ua taoto upu, lafoai ma faagalo.

Sa i ai taimi sa lutia ai i puava, peitai, ua alu alu le folaua, o lenei lava ua mapu i Fagalele. Sa i ai foi taimi sa feagai ai ma galu fatioo, peau ma auma galulolo o le vasa, peitai, o lea ua tali le Atua, mau pea le toovae ma le faatuatua i le Atua, aua o Samoa o le atunu tofi. Fai mai Tulafono a natura o mea o le lalolagi, a feagai oe ma fita ma faigata a o e folau ai i le loaloa o le vasa, ona e fesili lea i lou siosiomaga, fesili lava i lou siosiomaga, e te fesili i le matagi, e te fesili i le masina, o le la, o le savili, le matagi, o i ina e maua ai lou faasinoala.

E faapena foi pe a e asaina le tuavao, feagai oe ma fita ma faigata, le filifili ma le lavelave o le vao, ona e fesili lea i lou siosiomaga, e te fesili i laau, e te fesili i manufelelei ma manufetolofi ma le vaitafe, o i ina e maua ai lou faasinoala. O le talitonuga o le Au Kerisiano, a feagai oe ma puapuaga o le soifuaga, fesili i le Atua. Faafetai Tuimalealiifano i lou apaapa i ou faasinoala, sa e fesili i le siosiomaga, sa e saili i le Atua i taimi o faigata. Lea ua aumai le tali i le taeao lenei, ioe. Fai mai e iloa lava mauga maualuluga o Samoa e toa ai le puao, ae maua foi vai manino i vanu loloto o le atunu. Faamalo le tautua atunu, faamalo le pale, faamalo le ula. E momoli foi le faamalo i le Afioga i le Masiofo i le tuualalo ma le fautua. Ia faamanuia le Atua i le tulai mai e tauave le Tofi o Le Ao o le Malo mo le isi 5 tausaga o lumana.

O lea ua taoto le saunoaga ma le folasaga manino a le Afioga i le Palemia i le tulaga o le Faavae, o lea lava e sosolo i luga o le Faavae. Faamalo faafetai. O suiga foi ma Teuteuga o le Faavae e pei ona saunoa i ai le Afioga i le Palemia, ia o lea lava sa pasia i le Maota lenei sa faapena ona faaali foi i ai finagalo o Afioga i sui usufono mamalu e pei ona i ai.

Lau Afioga i le Fofoga Fetalai, o sa matou tala puupuu lena i lenei taeao e faaleo ai la matou faafetai i le tautua Malo ma le toe tulai mai ma le Tofia o le Afioga i le Tama a Aiga Tuimalealiifano e avea ma Ao o le Malo mo le isi 5 tausaga.

E momoli atu ai le faafetai i lau Afioga i le Palemia ma lau Kabeneta faapena foi lena Itu o le tatou Maota i lenei taeao. Ia manuia le faafogafoga mai a Samoa.

Afioga Lupematasila Galumalemana Tologata Togia Tile Leia (Falelatai ma Samatau): Lau Afioga i le Fofoga Fetalai...

FOFOGA FETALAI: Ia, e i ai foi le manatu le sui usufono mamalu o lea ua maua atu e le Nofoa, ae talitonu foi, e leai o taeao faapenei, o lea ua saunoa le Afioga i le Palemia, o lea foi ua talifuitau le Sui Taitai ua lava lea ma totoe e fai ma sui o le Maota. Ae faamalulu atu i le sui usufono mamalu, ia, atonu e i ai foi se isi taimi e toe maua ai sou avanoa, a o lenei lava taimi, ia ona o lo o faagasolo tulaga aloaia o le tatou Maota, ona faapena lea ona...

Afioga Lupematasila Galumalemana Tologata Togia Tile Leia: Faafetai i lau Afioga i le Fofoga Fetalai. Sa i ai lava le manatu e ese lava le puniloa ese le punimatatogo, ia ae tumu le itumalo o Falelatai ma Samatau i le faaaloalo i lau Afioga i le Fofoga Fetalai. Atonu a le maua so matou avanoa i le aso, ia maua i se taimi o lumana, fai atu se matou tala. Ma le agaga faaaloalo.

FOFOGA FETALAI: Malo faafetai. Ua faamalo faafetai malele i lau Afioga i le Tamaitai Palemia. Ua oooo i aai o finagalo lau saunoaga i lenei taeao. Ma e i ai le talitonuga ua faapena ona faafogofa manino le paia o le atunu, i le malamalama o lau saunoaga e tusa ma le faamoemoe o lenei taeao, aua le tofiaina o Le Áo o le Malo, malo faafetai. O lea foi ua talifuaiteau le Afioga i le Sui Taitai o le Itu Agai, ua faamalo saunoa ua faafetai tanoa. Ia atonu o lea ua fetaui fola, ua faafogofa foi le atunu ma le Maota, o lea ua faamanuia aua le tofiga o le toe tulai mai o le Tama Tauaana, le Afioga i le Tuimalealiifano aua Le Ao o le tatou Malo. O le mea lea, malo faafetai, malo saunoa.

Ia, ona o lo o faatino pea le tatou galuega, o isi faasilasilaga a le Fofoga Fetalai. E fia faailoa pea i le Maota, aemaise o se faafogofa manino a le atunu, i se mataupu ogaoga foi ua tuuaina sese ai e le Taitai o le Itu Agai au nei o le Fofoga Fetalai. O itu taua ua mafua ai ona lagona se leo o le Fofoga Fetalai i lea mataupu ona o le puipuiga lava o le mamalu ma le aloaia o le Palestene. E ui o aia saoloto e saunoa ai lo outou mamalu, aepeitai o galuega uma a le Maota lenei, e faatonufolau ma puipuia i Tulafono Tumau a le Palestene. E le soona tiutalaloa i ai se finagalo, leaga e mamalu le Fono tu maualuga lenei a le atunu. E tatou te naunau uma ina ia mamalu ma aloaia le tatou tausiga o le Palestene i lo tatou foi taimi e tusa o le filifiliga a le atunu. Po o a lava aga faapolokiki e tusa o faiga faatemokarasi, o tatou o matai e matau lava i le avafatafata ma le tatou aganuu. Peitai o lafoga soona tuulafoai a le Taitai o le Itu Agai ua faasalalau i ana faasalalauga i le TV ma le facebook, e lagona ai lava le faanoanoa, o au nei o le Fofoga Fetalai i ni lafoga faatamaiti, tulou le faafogofa mai a Samoa. O ni lafoga toilalo ma ni saunoaga faaletino, e le tau fesiligia foi le ia o le loloto ma ia o le taipapau ia fatufatuga faapea. E tatou te manino lelei i le taua o faiva faa-Itu Agai. A matau atu foi, o lo o olo lava le fua i lau Afioga i le Sui Taitai ma le toatele o lena Itu. O upu faalumaluma ua tuuaia seseina ai le Nofoa, se ua matua ofo le loto, ua pei e le o se tagata sa faaeaea ai le Maota lenei ma le atunu. Sa faafogofa foi Samoa i upu na lalafo mai ma tuuaina ai lou faaituau i totolu o le Maota lenei. O le a ea sau upu na ou tali atu ai? Sa ou tali lava i aiaiga o le tatou galuega. O lou faanoanoaga o le tausolomua i se Toe Ulutaia o le Maota lona le malamalama i Tulafono Tumau ua leva ona faataoto e faatonufolau ai galuega a le Maota.

E ao lava foi ona ou toe faamanino i le tatou Maota, o le faaiuga na faamalolo le tumau ai le Taitai o le Itu Agai, e le o se faaiuga na faia e le Fofoga Fetalai, e leai, o le faaiuga na faia e le Palestene. Ou te iloa lelei o le mafuaaga lea o le saili masei ma taumafai e faamataga lou tagata, i le tapisa faaia o le tai papau.

O lo o manino isi aiaiga mo sui usufono pe a faamalolo le tumau. Ia te au o le Fofoga Fetalai, e le tatau foi ona soona saunoa i matapu tau le Palestene, leaga e le toe talia pe amanaia i galuega fai a le Palestene. E ui o lo o umia

pea tofi o faasui usufono o le Palemene, a o le tagata lava ia e i ai le tofa fetalai e le tau aoaia e le Nofoa ma le Palemene. Ou te maua pea le loto faamagalo, ma ua ou lalafo i le Atua, o Ia na te tali atu i ai.

Samoa ma lau faafogaga, ou te malamalama lelei i lou tofiga o le Fofoga Fetalai. Na ou sau i totonusi o le Palemene o se sui o le Vaega Faaupufai a le Faatuatua i le Atua Samoa ua Tasi, o le Vaega Faaupufai foi lea, na filifilia au i le tofi Fofoga Fetalai. E le faapea a ou Fofoga Fetalai, ona aveese ai lea o lau aiatatau o au o le Sui o le Faatuatua i le Atua Samoa ua Tasi. A o le faatinoga o ou tiute faa-Fofoga Fetalai, o lo o outou molimau mai lava o lo o ou mulimulitai i le Tulafono ma faiga faa-Palemene e tausiai le Fonousua le atunuu.

O a tuuaiga sese ma le le sao e agai mai e faasese ai le Maota ma le atunuu, o lo o soifua le Atua. Ou te le fia gagana i ia mea, leaga e le masani ai lou olaga. O ai lava e saunoa ma gagana faapea, o ona lava ia mafaufau i mea sana ia faia.

Ou te lapataia lo tatou Maota, ia alolofa silasila mamao, tatou fesili i o tatou itumalo na filifilia mai i tatou, o i ina e maua ai fautuaga lelei mo le manuia o le tatou galuega. A o le naunau i le viiga ma le mamalu, e na o le toilalo popo ma le faalumaina i luma o tagata.

Ua ou faamagalo le mataupu lenei, e ui ina mataga tuuaiga. Ae mo le agai i luma o le tatou galuega, ou te fautuaina ina ia amanaia aiaiga o le tatou galuega, ina ia o tatou saili pea i mea sili aua le tapuaiga a Samoa.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Faafetai mo le avanoa. Sa nofonofo lava ma taumafai e tapue iuomatagi o lau saunoaga po o fea e agai i ai. E moni lava o lo o taua le Taitai o lenei foi Itu o le Maota, a o lea e afifio atu Afioga i sui usufono mamalu o le Itu Agai. Ona e pei e tau faiTauina po o matou po o le Taitai po ai, a o lea ua faalogologo ma le totoa.

Lau Afioga i le Fofoga Fetalai, e pei o tulaga masani, o le faatautoina o le Fofoga Fetalai, ona tulai lea e ave lona tofiga tutoatasi. E le aoaia e Laupua ia Tamafaiga. E le aoaia foi e le Matapia le manaia o le nuu. A o se matou tuualalo, o le matou tuualalo ma le ava e tatau ai. O lena e i ou aao le fofo o le mataupu, o lena e i ou aao. Ua manatu alofa atu, ioe ua manatu alofa atu. O le Nofoa e faaeaea uma i ai sui usufono mamalu uma o le Maota lenei. Ae o le matou tuualalo, o lena e i ou aao le fofo o le faafitauli ma le mataupu. Ia faaae mai sui usufono la, faaae mai, ioe tatou faafesagai. O tu ma aganuu a Samoa tatou faafesagai ma fai upu. Ia a o la e tu mai tua i o. Ia ou te alofa

atu lau Afioga, ona e maumau le saunoaga matagofie, ae le o afifio mai sui usufono ia. Ioe, na ona matou faapena atu, ma le agaga faaaloalo. O le matou faamatalaga lea, ia manuia le Fono.

FOFOGA FETALAI: Se i tulai mai le Afioga i le Minisita o Faatoaga ma Faiga Faiva.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Ioe, lau Afioga i le Fofoga Fetalai, o lenei lava e tau faatoatoa atu le taeao, ona e le faigofie le taeao lenei. A tomanatu i le mea lea ua agai i ai le saunoaga a le Sui Taitai a le Itu Agai, e lagona lava le faanoanoa, e lagona lava le faanoanoa. E leaga o lea ua agiga i malae lau Afioga lou mafatiaga.

O lea foi matou te lagona le ava atu, e leaga e le na o se Fofoga Fetalai o le Itu lenei, o le Fofoga Fetalai o le Maota. A o lea e matau atu, o i la e maua ai lo tatou filemu, o le faataatia o tatou Tulafono ma faaiuga, ae sosofa faapea?

Lau Afioga i le Sui Taitai, seu le manu ma tagai i le galu. E le faapena le faiga o tatou upu e tausi ai le vanonofo.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

Susuga Hon Laauli Leuatea Polataivao Fosi: E le o le auala lenei, o lea e tau faafilemu le finagalo o le Fofoga Fetalai...

FOFOGA FETALAI: Onosai mai lau Afioga...

Tofa Hon Lauofo Fonotoe Nuafesili Pierre Lauofo: O le matou lava upu o le tuualalo lea na faataatia atu. Matou te le aoaia le... e le aoaia e le matapia le manaia.

FOFOGA FETALAI: Onosai mai se i faauma le saunoaga a le Minisita.

Susuga Hon Laauli Leuatea Polataivao Fosi: E le o se faatoesega le mea lena sa tatau ona outou tulai mai...

Tofa Hon Lauofo Fonotoe Nuafesili Pierre Lauofo: E le o se faatoesega lea e avatu, o le tuualalo...

Susuga Hon Laauli Leuatea Polataivao Fosi: Faatoese i le Fofoga Fetalai, i luga i upu a le tou Taitai lea na fai...

Tofa Hon Lauofo Fonotoe Nuafesili Pierre Lauofo: O le tuualalo, a talia, faafetai. A leai o lena e silafia, o lena e i ina le tofa.

Susuga Hon Laauli Leuatea Polataivao Fosi: E te le ooaia le Fofoga Fetalai.

Tofa Hon Lauofo Fonotoe Nuafesili Pierre Lauofo: Ou te le ooaia se Fofoga Fetalai.

Susuga Hon Laauli Leuatea Polataivao Fosi: O a upu na e fai, o lea e i le tali....

Tofa Hon Lauofo Fonotoe Nuafesili Pierre Lauofo: O lena e i ou aao, o ia e pule i le Fono... Tulafono Tumau.

Susuga Hon Laauli Leuatea Polataivao Fosi: Lau Afioga i le Sui Taitai, e le o le tali lena o le taeao lenei.

Tofa Hon Lauofo Fonotoe Nuafesili Pierre Lauofo: Ia o lou lena taofi, ana o se taofi o oe, lelei, o le tuualalo lea e ave.

Susuga Hon Laauli Leuatea Polataivao Fosi: E le o le auala lena e aumai i le mataupu lenei.

Tofa Hon Lauofo Fonotoe Nuafesili Pierre Lauofo: A le talia, e leai se afaina, foi mai se manatu ma se tuualalo. A o le alofa, alofa i le Maota alofa ia Samoa. A soona fai lava i fea?

Susuga Hon Laauli Leuatea Polataivao Fosi: O le alofa i fea? O le a le alofa lea o le lafo o upu i le Fofoga Fetalai? O fea lo outou alolofa i le Fofoga Fetalai? O fea la outou faaeaea i le Fofoga Fetalai? O a upu ia tou te lalafo.

Tofa Hon Lauofo Fonotoe Nuafesili Pierre Lauofo: E leai ma se upu matuia, o lea e faafogga le Fofoga Fetalai, e leai lava ma sau upu matuia na fai i le Fofoga Fetalai. O le tuualalo, o alofa molipo...

Susuga Hon Laauli Leuatea Polataivao Fosi: Fonotoe tuutuu mamao le tofa. E le faataaloga i vai le....

Tofa Hon Lauofo Fonotoe Nuafesili Pierre Lauofo: O lea e mamao le tuutuuga o le manatu...

Susuga Hon Laauli Leuatea Polataivao Fosi: E le faataaloga i vai upu...

Tofa Hon Lauofo Fonotoe Nuafesili Pierre Lauofo: Ma le fautuaga o lea e ave.

Susuga Hon Laauli Leuatea Polataivao Fosi: E faafefea ona outou naunau e aumai o lea e soli le Tulafono, soli le Tulafono a le Faamasinoga.

Tofa Hon Lauofo Fonotoe Nuafesili Pierre Lauofo: E le taofia i matou e ave le matou tuualalo. E leai se mea o le a e otegia mai ai fua matou.

Susuga Hon Laauli Leuatea Polataivao Fosi: Ae faafefea ona momoli mai faapea. E le o le auala lena e fai ai mea.

Tofa Hon Lauofo Fonotoe Nuafesili Pierre Lauofo: O le tuualalo, o le saunoaga a le Fofoga Fatalai o la na saunoa.

FOFOGA FETALAI: Ia malilie ia...

Tofa Hon Lauofo Fonotoe Nuafesili Pierre Lauofo: O le matou tali, e le mafai ona matou nofonofo.

Susuga Hon Laauli Leuatea Polataivao Fosi: E le o le auala lena, seu le manu ma tagai i le galu, faaaloalo uma tatou i le tamaloa lea.

Tofa Hon Lauofo Fonotoe Nuafesili Pierre Lauofo: Ioe, seu le manu ma tagai i le galu.

Susuga Hon Laauli Leuatea Polataivao Fosi: O le Fofoga Fatalai a Samoa.

Tofa Hon Lauofo Fonotoe Nuafesili Pierre Lauofo: Ia seu le manu ma tagai i le galu Laauli.

Susuga Hon Laauli Leuatea Polataivao Fosi: Ioe, e le o le auala lea e momoli mai ai le mea lea.

FOFOGA FETALAI: Ia malie ia...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fatalai, fai lau saunoaga, fai lau faaiuga.

FOFOGA FETALAI: Ia malie maia lau Afioga i le Sui Taitai...

Susuga Hon Laauli Leuatea Polataivao Fosi: Ia silasila i le taeao lenei, i le loto faamagalo o le Fofoga Fatalai. Ae o le a le tali lea tou te aumai, e toe faafou mai o lea ua uma ona soli le Tulafono. O le ala lena, faamalulu atu, Speaker, malu ave i fale lou finagalo, ia fale i le fale o le Atua lou finagalo. Ia maua pea lou onosai ma lou faapalepale. O le matou tatalo lena.

A fai ua le faamagalo le Itu le la, ma le faatoese, matou faamalulu atu, leaga e pele ia i matou lou tulai mai e tauave le atunuu. Ia malu ave i fale lou finagalo i se upu ua lafo, e nisi ua soli le Tulafono o le Maota, tauvalea uma ai le Maota fono o Samoa. Ma le agaga faaaloalo.

FOFOGA FETALAI: Ua malo saunoa i lau Afioga i le Minisita.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fatalai o le Maota.

FOFOGA FETALAI: Lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Ou te talitonu o lea e manino lava le matou foi taumafai atu.

FOFOGA FETALAI: O lea ua maua atu, onosai mai... o lea ua maua atu lou finagalo.

Ia, talu ai, o uiga lava o tulaga faapenei o le Maota, o lea foi ua oooo i ooooga. Ae o le mea e sili ona taua, o lea tou te faafogaga mai, o lea ua faamagalo atu. E manaomia foi lo outou fesoasoani mai i le Nofoa, aemaise o le faafogagaaga a le atunuu ina ia tausolomua i tatou i le Maota ona maua pea le toa o le tai ma le toofilemu. O le mea lea, o lea ua fai atu le tala a le Nofoa, e le mafai foi e le Nofoa ona suia le faaiuga a le Palestene. O lea e pei ona taumafai le Minisita o Faatoaga e faailoa atu i lau afioga i le Sui Taitai, e le mafai ona suia e le Nofoa le faaiuga a le Palestene o lea ua taatia. E tatau ona lava lou silafia i ia tulaga. A o tulaga o le taeao, o lea ua avatu le tala a le Nofoa, ma ua faamagalo atu foi e le Nofoa, tatou agai i luma mo le lumanaia manuia o le atunuu. O se tala lea e faauma ai lea mataupu.

SAUNOAGA O MALIU

FOFOGA FETALAI: E faasilasila atu i le mamalu o le Palestene, le tuumalo o le Susuga Hon Jacob John Olaf Jack Netzler, i le aso 2 o Aokuso 2022.

O le Susuga Hon Jacob John Olaf Jack Netzler sa avea ma Sui Usufono o le Palestene mo le Au Palota Taitoatas (Individual Voters) i le:

- Faaiuga o le Paeaiga Lona VII mai le tausaga 1979 – 1982,

- Paeaiga Lona VIII mai le 1982 – 1985,
- Paeaiga Lona IX mai le 1985 – 1988,
- Paeaiga Lona X mai le 1988 – 1991,
- Paeaiga Lona XI mai le 1991 – 1996,
- Paeaiga Lona XII mai le 1996 – 2001.

Na avea foi ma Minisita o le Kapaneta mai i le

- 1982 – 1985 Matagaluega o Faatoaga, Faiga Faiva ma Vaomatua.
- 1985 – 1988 Matagaluega o Galuega
- 1988 – 1991 Matagaluega o Falemeli ma Fesootaiga.
- 1991 – 1992, Matagaluega o Faatoaga, Faiga Faiva ma Vaomatua, Faleoloa o Faatoaga, Matagaluega o Felauaiga, Gataifale, Vaalele Sivili ma Pulega o le Malae Vaalele, Kamupani Vaa a Samoa, Kamupani Vaalele a le Polenia ma le Fuimu.
- 1992 – 1996, Matagaluega o Felauaiga, Gataifale, Vaalele Sivili ma Pulega o le Malae Vaalele, Kamupani Vaa a Samoa, Kamupani Vaalele a le Polenia ma le Fuimu.
- 1996 – 2001, sa avea ai ma Taitaifono o le Komiti o Talosaga, Komiti o Tulaga Aloaia ma Amio Taualoa, Komiti o Mataupu Tau Lotoifale ma le Siosiomaga. Sa avea foi o ia ma Sui Usufono o le Komiti Filifilia mo le toe iloiloina o le Tulafono o Faiga Palota.

O ia o se Sui o le Vaega Faaupufai e Puipuia Aia Tatau a Tagata po o le HRPP.

E avea ai lenei avanoa e fai au ma Sui o le Palemene e molimoli atu ai faamafanafanaga ma faamaisega i le faletua ma le nofo-a-alo, aemaise o le aiga ona o le sa pele ua toesea ona o le valaau a le Atua i le sa pele ma mamae le mafutaga.

O le mea lea ou te valaau atu ai ma le agaga maualalo i le mamalu o le Palemene, ina ia tatou tutulai faatasi ma le filemu mo se minute e tasi, e faailoa ai lo tatou faaaloalo i le Sui Usufono, ua fai i lagi le folauga.

Na faaalia le agaga faaaloalo o le Palemene i le sui usufono ua tuumalo i lo latou tutulai mo se minute e tasi a o saunia e le Fofoga Fetalai se tatalo.

TUUIINA ATU O PEPA

Na tolaulau e le Failautusi i le Fono Aoao le faagasologa o Pepa e tusa ai ma le T.T.49(2).

1. P.P. 2022/2023, Nu 27, Lipoti Faaletausga a le Auaunaga o Vaa o Samoa mo le Tausaga Faaletuple faaiuina i le aso 30 Iuni 2021.
2. P.P. 2022/2023, Nu 28, Lipoti o le Koviti -19 ma Aiatatau a Tagata Soifua i Samoa 2022, Ofisa o le Komesina o Sulufaiga.
3. P.P. 2022/2023, Nu 29, Lipoti Faaletausaga a le Matagaluega o le Soifua Maloloina mo le Tausaga Faaletuple faaiuina i le aso 30 Iuni 2021.
4. P.P. 2022/2023, Nu 30, Lipoti Faaletausaga a le Matagaluega o Tiute ma Tupe Maua mo le Tausaga Faaletuple faaiuina i le aso 30 Iuni 2021
5. P.P. 2022/2023, Nu 31, Lipoti Faaletausaga a le Pulega o Tagata Tafafao Maimoa mo le Tausaga Faaletuple 2020/2021,
6. P.P. 2022/2023, Nu 41, Tali a le Malo i le P.P. 2022/2023 Nu 17, Lipoti a le Komiti o Tupe Maua ma Tupe Totogi i le P.P. 2020/2021 Nu 110 ma le P.P. 2021/2022 Nu 11, Lipoti Faaletausaga a le Falemeli o Samoa mo Tausaga Faaletuple 2019/2020 ma le 2020/2021
7. P.P. 2022/2023 Nu 42, Lipoti Faaletausaga a le Matagaluega o le Va-i-Fafo ma Fefatauaiga mo le Tausaga Faaletuple faaiuina i le aso 30 Iuni 2021.

FOFOGA FETALAI: Tulai mai lau Afioga i le Palemia.

Afioga Hon FIAME NAOMI MATAAFA: O lo o matauina le faagasologa o le Pepa o Galuega i lenei aso. E matauina foi e le o atoatoa le siufofoga o lau Afioga ua lavea i le flu. E avatu se tuualalo po o le a se finagalo o le Nofoa ae fai sina tatou malologa i le tatou malutaeao e tausaili se malosi o lau Afioga. A leai, fili mai se isi o le auvaa o le tatou Maota e faaauauina le tatou galuega i lenei taeao.

E pei o se tuualalo lea ma le faaaloalo.

FOFOGA FETALAI: Ia faafetai i lau Afioga i le Palemia, faafetai foi mo le silasila mai i le Nofoa. E faamalulu atu i le Palestine ma le faafogofa a le atunu, ona o le le atoatoa i lenei taeao.

Ae ua i ai le manatu o le a faavave le tatou malologa, o le a faataatiaeise le tatou galuega mo le 15 minute, ona toe faaauau ai lea o le tatou galuega.

Na faataatiae Galuega a le Fono Aoao Faitulafono mo lana malologa masani i le itula e 10:18 i le taeao ma toe faaauau i le itula e 10:51 i le taeao.

FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faapalemene e tusa ai ma T.T.52(5).

1. P.P.2022/2023 Nu.32, Lipoti a le Komiti o le Vaega Tau le Tamaoaiga i le Tulafono Tau Faaofi o Teuteuga o le Tulafono o Lafoga o Tupe Maua 2021;
2. P.P.2022/2023 Nu.33, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le S.R.2021/5, Tulafono o le Ulufale mai o Tagata 2020 – Faasilasilaga o le Amata Faamamaluina;
3. P.P.2022/2023 Nu.34, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2021/2022 Nu.34, Lipoti o le Faiga Palota Aoao 2021 a le Faamasinoga Sili a Samoa Lomiga 1 – Lipoti o Tagi o Faiga Palota mo Itumalo o Upolu ma Savaii i Mataupu na toe faaui i tua ma Faiga Tauvalea & P.P.2021/2022 Nu.35, Lipoti o le Faiga Palota Aoao 2021 a le Faamasinoga Sili Lomiga 2 – Talosaga o Faiga Palota 2021 – Tuufaatasiga o Faaiuga;
4. P.P.2022/2023 Nu.35, Lipoti a le Komiti o le Vaega Tau le Va Fealoai i le P.P.2020/2021 Nu.63, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2019/2020;
5. P.P.2022/2023 Nu.36, Lipoti a le Komiti o le Vaega Tau le Va Fealoai i le P.P.2020/2021 Nu.98 & le P.P.2021/2022 Nu.53, Lipoti Faaletausaga a le Iunivesite Aoao o Samoa mo Tausaga Faaletupe 2019/2020 & 2020/2021;
6. P.P.2022/2023 Nu.37, Lipoti a le Komiti o le Vaega Tau le Va Fealoai i le P.P.2020/2021 Nu.129, Lipoti Faaletausaga a le Auaunaga o Falepuipui ma le Toefuataiga mo le Tausaga Faaletupe 2019/2020;
7. P.P.2022/2023 Nu.38, Lipoti a le Komiti o le Vaega Tau le Va Fealoai i le P.P.2020/2021 Nu.130 ma le P.P.2021/2022 Nu.56, Lipoti Faaletausaga a le Matagaluega o Tina ma Tamaitai, Atinae o

- Nuu ma Afioaga ma Agafesootai mo Tausaga Faaletupe 2019/2020 & 2020/2021;
8. P.P.2022/2023 Nu.39, Lipoti a le Komiti o le Va Fealoai i le P.P.2020/2021 Nu.133 ma le P.P.2021/2022 Nu.15, Lipoti Faaletausaga a le Pulega o Faailoga ma Tusipasi Taualoa a Samoa mo Tausaga Faaletupe 2019/2020 & 2020/2021;
 9. P.P.2022/2023 Nu.40, Lipoti a le Komiti o le Va Fealoai i le S.R.2021/1, Tulafono Faatonutonu o Puipuiga ma Aafiaga o le Tapaa (Laiseneina) 2020.
 10. P.P.2022/2023 Nu.43, Lomiga Faa-Peretania o Lipoti a le Komiti Faapitoa a le Palemene i Tulafono Tau Faaofi o Teuteuga o le Faavae 2020, Tulafono Tau Faaofi o le Faamasinoga o Soligatulafono 2020 ma le Tulafono Tau Faaofi o Fanua ma Suafa 2020.

Ma le faaaloalo lau Afioga.

LAFO A LE MALO

FOFOGA FETALAI: Ou te tapa lau Afioga i le Palemene mo le Lafo.

Afioga Hon FIAME NAOMI MATAAFA: Lau Afioga i le Fofoga Fetalai ma le mamalu o le Palemene, ua ou tulai e faailoa atu, o lenei lafo ua tapena e le Malo e faatatau i le lafo na faatuina ma pasiaina i le Fonotaga i le aso 3 Iuni 2022 i le Lipoti o le Taunuuga o le Suesuega a le Komisi Suesue Faapitoa e faatatau i le Mataupu na Laga e le Loia Sili e uiga i Teuteuga o le Faavae 2020 ma le Tulafono o Fanua ma Suafa 2020.

E pei ona silafia e le mamalu o le Palemene, na maua mai i sailiilliga a le Komisi i lana Lipoti, e i ai ni suiga na toe faia i nei Tulafono e Lua, Teuteuga o le Faavae 2020 ma le Tulafono o Fanua ma Suafa 2020, ina ua maea ona pasia e le Palemene i le aso 15 o Tesema 2020. Ma, o suiga na faia, e le talafeagai ma e le i faia i ala o le Tulafono.

O lenei mataupu na tulai mai ina ua fesiligia e le Loia Sili le Ofisa o le Fono Aoao Faitulafono mo se kopi o nei Tulafono o lo o i ai le Maliega a Le Ao o le Malo. Sa tali le Ofisa o le Fono Aoao Faitulafono, o lo o i ai ni eseesege o kopi na pasia e le Palemene ma le kopi na tuuina i ai le maliega a Le Ao o le Malo.

O le faafitauli na tulai mai e pei ona maua mai Sailiiliga a le Komisi Suesue Faapitoa e faapea; e tele suiga ogaoga sa faatinoina e le au ofisa i luga o le Tulafono Tau Faaofi o Teuteuga o le Faavae 2020 ma le Tulafono Tau Faaofi o Fanua ma Suafa 2020. Ma o nei suiga na faia lava ma le mautinoa.

I le Fonotaga a le Palemene i le aso 3 o Iuni 2022, sa ou faatuina se lafo, ina ia faasee le mataupu lenei i le Pule Faatonu ma le Loia Sili e tapena mai ni Teuteuga talafeagai i Tulafono ua suia ma ala e faatino ai.

I le maea ai o le galuega a le Soa-Komiti o le Pule Faatonu ma le Ofisa o le Loia Sili e pei ona faatonuina e le Palemene i le aso 3 o Iuni 2022, na tuuina mai ai le fautuaga faaletulafono ma ala e faatino ai.

O le fautuaga faaletulafono a le Malo e faapea;

1. Ia faia se Lafo aua se finagalo o le Palemene ina ia talia ma pasiaina le fautuaga ma ala e toe faasao ai Tulafono moni na pasia e le Palemene i le aso 15 o Tesema 2020 ma ia fofo ai le faaletonu na tulai mai e pei ona maua i saililiga a le Komisi Suesue Faapitoa a le Palemene.
2. Ina ia toe aumaia vave se Tulafono Tau Faaofi e toe teuteu ai le Tulafono Tau Faaofi o Fanua ma Suafa 2020 ina ia foia ai le toa lea ua i ai le Faamasinoga o Fanua ma Suafa ma le tofiaina o Afioga i Faamasono o Fanua ma Suafa. Ma o lo o i ai se fuafuaga e folasia lenei Tulafono Tau Faaofi i le Palemene i se taimi lata mai.

Lau Afioga i le Fofoga Fetalai, o lea, i le ava ma le faaaloalo tele ou te faatuina ai se Lafo e faapea;

1. *Ia faataatiae taimi faatapulaaina o le 1 le masina i le Tulafono Tumau 113(5)(A) e mafai ai ona faaleaogaina le faamaoniga o se Tulafono ua uma ona faamaoniaina e Le Ao o le Malo, de-assent.*
2. *Ia faatagaina le Ofisa o le Fono Aoao Faitulafono e amata faagasolo loa taualumaga o le faaleaogaina o le faamaoniga o le maliega a Le Ao o le Malo, taualumaga o lo o faaleaogaina ai o le faamaoniga o le maliega a Le Ao o le Malo, de-assent o Tulafono e Lua e pei ona taua. O nei taualumaga o lo o aiaia mai i lalo o le Tulafono Tumau 113(5).*
3. *E tusa ai ma Tulafono Tumau 113(4), ia faatinoina loa tiute o le Failautusi o le Fono Aoao Faitulafono, e vave faamatuuese Tulafono e Lua o le Teuteuga o le Faavae 2020 ma le Tulafono o Fanua ma Suafa 2020 ma toe tuuina atu Tulafono Tau Faaofi moni na pasia e le Palemene mo le faamaoniga, re-assent e le Afioga i Le Ao o le Malo.*

Ma le faaaloalo lava lau Afioga.

Faaluaina e le Sui Palemia ma le Minisita o Faatoaga ma Faiga Faiva.

FOFOGA FETALAI: Ua manino le saunoaga a le Tamaitai Palemia i le Lafo a le Malo. A toe tomanatu foi i taualumaga o lenei mataupu i taimi ua sola, o lo o ogatasi lava le Lafo ma le agaga na taunu i ai a tatou felafolafoaiga.

Ia, ona i ai lea o le manatu o le Nofoa, ia o le a tuu atu le avanoa i lau Afioga i le Sui Taitai ma sina toatolu mai Sinia o lena Itu o le Maota, ia, e faapea foi se toatolu o lea Itu e faaali ni tou finagalo aua le Lafo faatu a le Malo. Ou te talitonu lava o lo o manino le Lafo e pei ona tuuina atu.

Ia, se i tulai mai lau Afioga i le Sui Taitai.

Tofa Hon LAUOFO FONOTOE NUAFESILI PIERRE LAUOFO:
Faafetai mo le avanoa lau Afioga i le Fofoga Fetalai o le Maota. Ia, atonu e le te i foi le faalogologo atu i le Lafo ua faatu ma faataatia i le Laulau-a-Fono i lenei taeao aua o lea e matau atu o le fautuaga lava lea a le Afioga i le Loia Sili lea ua sosolo lava i luga le Lafo Faatu.

A tomanatu i tua i lena foi Paeaiga i le Komiti Faapitoa sa tofia ma faatuina i totonus o le Maota e sailiili galuega ma aumai ni fautuaga a le Faamasinoga o Fanua ma Suafa. Ia e tele lava nai mataupu taua sa aumai i le Lipoti a lena foi Komiti e faavae ai Tulafono Tau Faaofi e Tolu na faataatia i le Laulau-a-Fono i le Paeaiga ua tuanai, sa faapena ona soalaupule ma faasee atu i le Komiti Faa-Palemene latou te iloiloina, le Komiti lea sa soo ai Samoa, sa savalia ai le motu tele i Salafai, savalia ai foi Tumua nei, aumai ai le latou Lipoti e lagolagoina Tulafono ia e Tolu, e aofia ai ma le Teuteuga o le Faavae, e manaomia ai le 2/3 o le Maota ma le lagolago a le Maota. Na aumai ai ma le latou mau e faapea, o lea ou te tau manatua e 90% o le atunuu e lagolagoina nei Tulafono e Tolu. Peitai ina ua pasia ma faamalosia, ia ua aliae mai e i ai nai lape o ia Tulafono e pei ona aumai ma momoli mai i le Lipoti a le Susuga i le Failautusi o le Fono ma faailoa mai ai, ia o lape lava o le Matagaluega po o le Ofisa ma le auaunaga.

Ia e faapena lava uiga o tatou, e i ai lava taimi e sasi ai, e i ai foi taimi e sese ai. Na aumai manino, na aumai ai ma le fautuaga a le Loia Sili ina ia faatu se lafo e faataatiae Tulafono Tumau 113(5) ona na o le tasi le masina e mafai ai ona faatino le mea lea o le de-assent ma le re-assent. Ae tofia ai loa ma le isi Komiti Faapitoa lea foi sa fai a latou sailiiliga, e i ai la le Lipoti lea na faataoto foi i le Laulau-a-Fono e pei ona saunoa malamalama i ai le Afioga i le Palemia.

Ou te manatua foi la le fautuaga muamua o le Lipoti a lena Komiti e faasolomuli Tulafono nei. Peitai, sa faatu le lafo e le Afioga i le Palemia e faataatiae na fautuaga ona o lea lava foi sa finau atu lenei Itu, ona e leai se Tulafono Tumau po o le Tulafono Faavae e faavae ai lea foi finagalo ma lea fautuaga. O lea sa pasia ai le lafo, faataatiae lena fautuaga ae se i toe silasila le Pule Faatonu, le Executive ma le Ofisa o le Loia Sili. Ia o lea la ua taoto mai i lenei taeao le lafo faatu ua aumai i Tulafono nei.

Ia ae tomanatu foi i tua i le tau amataina mai o Tulafono Tau Faaofi e tolu, e le i faigofie. Sa i ai lava foi i latou sa tetee i nei Tulafono, faaaogaina o le latou aiatatau e faaalia ai o latou finagalo, sa faapena foi ona lomia i le tele o nusipepa, leitio, televise le tetee foi o nisi o latou, faaali foi o latou

finagalo, e faapea foi le Sosaiete a Loia, sa faaali foi le latou tetee, faapena foi ona momoli ma latou mafuaaga o le latou tetee na momoli i luma o le Komiti a le Palemene.

Ae manatua foi lau Afioga lea foi sa lomia e se tasi o nusipepa finagalo foi o Afioga i Alii Faamasino o Faamasinoga o Soligatulafono e tusa lava ma nei Tulafono Tau Faaofi. Ia o la ua pasia Tulafono, ma o lea la ua tulai mai ai le tulaga e pei ona i ai ma le faafitauli. Ia ae saunoa malamalama foi le Afioga i le Palemia, o la e foi e toa ai galuega o le Faamasinoga o Fanua ma Suafa.

O lo o i ai foi mataupu a lenei itumalo o lo o faatalitali, ona o le tulaga e pei ona tulai mai i o i le Faamasinoga le la. Ae faafetai o lea la ua ou vaai atu, e leai la o lea ua maua le avanoa o le a toe faagasolo le galuega e pei o tualga masani a le Faamasinoga o Fanua ma Suafa aua foi le paia ma le mamalu o le atunu o lo o autovaa atu i le la Faamasinoga aua a latou mataupu.

Ia, o lea foi e matau le tulaga o isi foi mau finagalo faaalia, ae o lea foi ou te manatua, ia e i ai foi taimi i lena foi vaitau e ki atu lau TV ae taia au, taia au i se siufogfa malosi o sau i luga o le TV; Samoa e! Samoa e! a tulai mai le Vaega lenei e soloia uma lava Tulafono nei. E soloia uma. Talofa i le atunu ua faoa measina a aiga. Ae faafetai o lena ua faatu le lafo e faaauau Tulafono, faaauau Tulafono e pei ona aumai.

Ia o le tulaga lea, o le faafetai i le manatu i o i le Faamasinoga o Fanua ma Suafa ona e tele mataupu ia ua toa, ae o lea o le a maua le avanoa e toe faasolo ai ma sologa lelei ai tulaga e pei ona taumafai atu i ai le tatou Faigamalo. Ia, a o fautuaga lava ia o lea ua leva ona i luma o le Maota, lea ua leva ona taatitia. Faafetai foi o lea ua alu alu, e ui lava ina tatou ui mai i ogasami soua ma le louloua, ae o lea lava ua mapuea le iasa i gataifale o tai malu ma tai toa i lenei mataupu.

O le matou faamatalaga lea lau Afioga i le Fofoga Fetalai. Ia manuia tele le Fono.

FOFOGA FETALAI: Faafetai, malo saunoa. Ia, tulai maia le sui usufono o Anoamaa 1, o se tasi foi o sui usufono matua o lena Itu.

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1): Malo faafetai i lau Afioga i le Fofoga Fetalai. Faafetai foi mo le avanoa. E manatu foi o lea ua uma ona paepae tulaga uma lava o lenei taeao na liugalua, o sa ma mamalu, ua uma foi ona tatou faasifo i le Atua i le taeao.

Faafetai foi i le Atua o lea ua maua sou faasiligamalosi lau Afioga i le Fofoga Fetalai i lenei taeao. Ae ua faalogologo ma le totoa i le lafo ua faatu, e momoli atu le agaga faafetai i le Afioga i le Taitai o le Malo e tusa ai foi ma le lafo. Ae a ou vaavaai i tua i le faamoemoe lea, e le na ma le po malae,

o au le isi sui o le Komiti lea sa i ai i le iloiloina o le mataupu. Ia, lea foi sa ou le saini i le Lipoti. Sa tele lava la ina ou nofonofo lava ma ou faalogologo a o feagiai solo lava, sa i ai foi le taimi sa taua ai e lau Afioga i isi taimi e oo mai i le aualii ia e le i saini.

Ae ua ou manatu o lou avanoa lelei lenei lau Afioga i le Fofoga Fetalai, o au e tumu i le ava o au foi e tumu i le faaaloalo i tiute o Komiti ma lo latou valaauna. Ou te le faataumatatao foi i tulaga e pei ona i ai mea e ao ona fai i tatou Komiti. Ae ua ou matauina lava lau Afioga i lea vaitau, e pei ua ave, tau avesese faapolokiki, politicize e itu le tulaga lea. O le mea foi lea ou te faamalulu atu ai i lau Afioga e pei ona ou fai atu, o au e tumu i le ava ma le migao i tiute ma tofiga ua valaauna ai. E leai se agaga i tua i lou faamoemoe sa i ai pe ou te tetee i lou valaauna i le Komiti. E leai. Sa ou tatalo lava i le Atua e fesoasoani mai i sou vaivai po o le a le mea e ao ona fai. Ia, e moni lava foi e nofonofo atu lava, ae ua fai foi si leva na i ai i le Maota. O tulaga uma ia sa vaavaai i ai, sa faapea i le matou ia galuega e fausia sa matou tuutuualalo i e ua tofia i le Komiti. Peitai ane, ia o lea ua aumai le lafo faatu o le a toe teuteu ai le mataupu lea ma toe faaleleia ai ma agai i luma le tatou Tulafono.

O mea ia so o se Tulafono lava, e tatau ona... aua e ese lava mea e pasia... o lau matau lea, e ese lava mea e aumai ai finagalo o sui usufono, ae i ai le process foi lea e tau e tatou e toe siaki ai po o le vetting process, o mea ia e ao ona toe faaleleia i le tatou process lea po o le tatou alafua lea e siaki ai Tulafono ae le i faaooina i o i Le o Ao o le Malo. Aua po o le a le mea e pipii ai le saini a Le Ao o le Malo, o lou talitonuga, o le mea lena e savavali ai tagata, o le faaiuga foi lena o so o se Tulafono. Ia afai lava la ua matauina le faamoemoe lea e sese ona e i ai nai lapse ia, ae so o se tagata ola foi lava, e vaavaai lava se mea e sao ai se mea faaletonu e tuu i ai sona ia manaoga, lea e faa-Peretania o loopholes, e sailiili lava e le tagata ia i lona malamalama, ona pei lea e avea mea ia e avea ai tatou pei na o ni tagata foi ia e omai e fai galuega ae le malamalama i le mea la e fai.

O le ala lea ua taua ai i lau faalogologo le lafo ua faatu mai se i foia ai mea ia mo le agai i luma o le tatou Palemene aua e le mafai e sui usufono ona toe aumai toe auiliili uma mea, ia faatoa siaki atu e tagata faigaluega ma i latou e faaaogaina le Tulafono, a ua to i tua Apolima e pei o lea upu.

A o lenei taeao, ia, o le ala lea o lou tulai atu, ae matou te talia ma le agaga faafetai le tulaga o le a oo i ai le toe faaleleia o Tulafono ia. O le isi foi lea mea tatou te vaavaai i ai, e ao lava ona maioio lelei tofiga o tagata ma lo latou appointment o tagata nei. Leaga o isi tagata, faatoa faamalolo lava pe a tai 68 tausaga. Afai lava la e le sao le tofiga, o le a tatou alu le sao ai lava, ae manaia, aua ne i tuua, o le agaga lava lea, aua ne i tuua i se tagata e toatasi pe toalua e faia ia mea, e tatau ona i ai auala lelei ma auala mama e ui ai tagata i le tofiaina o sui aemaise i latou o le a gafataulimaina se Tulafono.

Ia alofa mai le Atua i lenei taeao. O le matou foi matau i le tatou Fono, ia, luga lalo foi lenei taeao, ae matua lava le tuu i lau Afioga i le Fofoga Fatalai. E matua atu i ina le tatou Maota, faatoatoa ia maua lau tofa e faatoatoa ai le Maota o Samoa.

Ia manuia le Afioga i le Taitai o le Malo, manuia foi le Kabeneta, ia manuia lenei Itu i le alofa ma le agalelei o le Atua. Soifua ma ia manuia.

FOFOGA FETALAI: Malo fetalai le sui usufono mai Anoamaa 1, faafetai foi mo le faasoa. O lea ua matau atu, o lea lava ua tumau lava le lagolagoina o le lafo faatu a le Afioga i le Palemia ona o le manatu lava ia sologa manuia le tatou galuega. O le mea lea, ia, o lea ua matau atu o lea ua...

Oi, ia, o le a lafo atu ia la i le sui usufono lea e faaatoa i ai le toatolu o lea Itu lau Afioga i le Sui Taitai.

Ia, saunoa mai lau Afioga i le sui usufono mo Vaimauga 1.

Afioga SULAMANAIA FETAIAI TAUILIILI TUIVASA (Vaimauga 1): Lau Afioga i le Fofoga Fatalai, a o le i fai foi se sao o lenei itumalo e tusa ai ma le lafo ua opea i le Maota, e muamua ona momoli le agaga faafetai i le Atua i lenei taeao, aua o upu lava a le atunu a malie lava se pese ta te fia siva lava. E amata mai lava i le taeao ina ua toe tofia le Afioga i Le Ao Mamalu o le Malo e toe faaaauau le isi 5 tausaga. Ia e meemee lava le agaga i lenei taeao.

A o le i faia se sao i lenei mataupu, e momoli le agaga faafetai i le Afioga i le Tamaitai Palemia ma le Kabeneta ma lena Itu o le Maota e tusa ma le lafo. O le sui usufono lenei sa i ai i totonu o le Komiti lea sa talanoaina po o le 9 masina sa faasolo ai le agaga o le faasopolia o le atunu. O le agaga faafetai i le Atua sa moe lava i le lefulefu ma tuuina atu lenei mataupu i le Atua ina ia vave ona to manu, ona e malamalama lelei le sui usufono lenei ina ua pasia e le Palemene lenei mataupu, e le mafai e se Komiti po o ni tagata toaititi ona toe sui. E mafua i se a? Leaga o lena e i ai i totonu ma le Teuteuga o le Faavae. E le o po foi se lilo o lea na aumai i totonu ma aumai foi le fautuaga a le Komiti sa i ai, toe faasolomuli. Ia lea foi na tetee lava lenei itumalo, e le mafai e se Komiti ona toe faia leaga o le Teuteuga o le Faavae, e manaomia le 2/3.

O lenei la itula ma le tulai o lenei sui usufono o le Vaimauga, e momoli le agaga faafetai i lau Afioga i le Tamaitai Palemia ma le faauuga a le Atua ua i ai, lea ua toe aumai se i toe faafoi lava i le Afioga i le Failautusi tulaga sa i ai lenei mataupu, ona na pasia i inei i le Palemene lenei, e le mafai la ona toe fai i ai ni finagalo o ni Komiti ma nisi seiloga e maua le 2/3. A o le Tulafono foi lenei o Fanua ma Suafa tulou le Maota lenei, so o se Samoa lava e tatau ona mitamita ai. E mafua i se a? O lea ua aveifo i luga, ua tau alu ifo i luga le tulaga o le tatou Fanua ma Suafa e faatusatusa i le Tulafono

o Faamasinoga o Soligatulafono. Se i tulou lava, e pei lava le Tulafono o Fanua ma Suafa e pei o le atalii o le Faamasinoga o Soligatulafono, e ave lava le faamuamua i ai. Ae a lenei mataupu i Fanua ma Suafa e faamemelo i ai le atunu ma o i ai? Seiloga lava e uma mataupu i luga faatoa afea lalo. Ae o se agaga faafetai lea ina ua tulai ma toe teuteu Fanua ma Suafa, e oo uma lava i ai le paia o si o tatou atunu e oo lava i alo ma fanau e le i fananau mai.

O le agaga meemee lena o lenei itumalo ma lenei sui usufono, o lea ua toe aumai lava i totolu o le Palemene lenei e faatino. O lo o tatalo foi ma nonomanu le paia o le atunu, ua toa mataupu i totolu o le Faamasinoga, ona o lea e talia ia i tatou o le Palemene lenei.

A o le agaga faafetai o lenei itumalo i lau Afioga i le Tamaitai Palemia ma le Kabeneta ma lena Itu, lea ua tatala le tofa ma aumai i le taeao lenei ina ia mafai ona toe faanatinati mea na pasia e le Maota lenei, ma toe tuuina atu loa i le Afioga i Le Ao Mamalu o le Malo.

O le Tulafono lenei o le Tulafono foi lenei lea na tele ina gugulu ai le atunu. Ae so o se Samoa lava e faataua le Tulafono lenei, e mimita lava, ona e a? E le i i ai i totolu o le Faavae le pulega a alii ma faipule, le pulega toatele, sa i fafo. Pau lava le tulaga sa i totolu na o le tagata e toatas. Ae a le teuteuga lea ua i ai? Lea faatoa tuu i totolu o le Faavae. O ai e faia le faaiuga? E fai e alii ma tamaitai Faamasino. O lona uiga la, pei ona saunoa foi le Sui Taitai o lenei Itu, o nisi ia o faalauiloa sa faatino a lena Itu na sese ai le atunu. A o le agaga lava ia, o le agaga o le faafetai, o lea ua faatoa toe aumai le tulaga e teuteu ai le mataupu...

Afioga Hon Fiame Naomi Mataafa: Lau Afioga i le Fofoga Fatalai o le mea e fia faasao.

FOFOGA FETALAI: Ia, se i tulai mai le Afioga i le Palemia. Ia saunoa lau Afioga i le Palemia.

Afioga Hon Fiame Naomi Mataafa: Lau afioga i le Fofoga Fatalai, o le lafo e le o talanoaina le tino, le uiga o le Tulafono. E na o le pau lava le autu o le lafo lau afioga i le Fofoga Fatalai o le tapena o le aoao o le Tulafono, e toe faafdoi i le mea na pasia e le Maota lenei.

E na o le pau lava lena aua a tatou le toe foi i le mea na pasia e le Palemene lenei, e le mafai ona toe fai nisi a tatou suiga lea e manaomia, e fesoasoani i le toa o lo o tulai mai.

Ia e malie lava saunoaga a sui usufono, ou te le faatauagavale foi i finagalo ua faaalia. Ae te i ua tatai ese ia le autu o le lafo, i uiga o le taua ma mea o lo o aumai ai i totolu o le Tulafono. E na o le pau lea ne i te i ua see mamao ese ia le tatou talanoaga faamolemole.

FOFOGA FETALAI: Ia masalo ua manino mai ia le sui usufono mamalu. Ia e le o agai mamaao lava ia le tatou talanoaga o lo o agai lava i mea o lo o aumai i le tatou lafo.

Afioga SULAMANAIA FETAIAI TAUILIHLI TUIVASA: Lau afioga i le Fofoga Fetalai e malamalama lelei le sui usufono lenei. E pei o le agaga lena na avatu ai, o lea ua toe foi lava le lafo i le mea lea na pasia. O le mea la lea na pasia lea na fai atu ai le sui usufono, o la e i totonu le mea lea na ou talanoa atu ai.

O le agaga lena o le meemee ma le faafetai, o lea ua toe foi lava le tulaga i mea na pasia e le Maota lenei, faamatietie ma tuu i luga ia le Faamasinoga o Fanua ma Suafa.

Lau afioga i le Fofoga Fetalai, o le agaga lena i lenei taeao. Afai foi ua paopapa se faamatalaga ae o le agaga faafetai i le Atua, o lea ua toe taatia lava ma toe alu i tulaga e tatau ona i ai, e toe aumai i totonu e faatino le galuega a le Failautusi, ae toe tuuina atu i le Ao o le Malo i lana sainiga i mea na pasia e le Maota lenei. Ma lou agaga faaaloalo.

FOFOGA FETALAI: Malo, faafetai. Ia malo le saunoa, faafetai foi le faasoa i lea Itu o le Maota. Ia lafo atu ia i lea Itu o le Maota lau afioga i le Minisita o Pisinisi ma Alamanuia ma Leipa.

Tofa Hon LEATINUU WAYNE SOOIALO (Minisita o Pisinisi Alamanuia ma Leipa): Ia e muamua ona momoli atu le faafetai tele i lau afioga i le Fofoga Fetalai. E muamua foi ona ou faatulou atu i le paia o le Palemene ma le mamalu foi i lena Itu, afio ai lau Afioga i le Fofoga Fetalai. E le gata foi i lea o le afio o le Afioga i le Palemia, aemaise foi le mamalu o le Kapeneta ia ma Minisita Lagolago, aemaise foi o lena Itu. O lea e ao ai ona tatou faafoi le Viiga i le Atua i lenei taeao.

Sa i ai foi se manatu ailoga a toe maua se avanoa e fai ai se faamatalaga i lenei Tulafono. A tomanatu i tua atu i tausaga ua tuanai po o le Paeaiga ua tuanai atu nei, e tasi lenei Tulafono na faatea ai au e le Vaega Faaupufai e Puipuia Aiatatau a Tagata ma aveesea ai au ma le Vaega Faaupufai sa ou filifilia ou te oo mai ai i totonu o le Palemene. Ae peitai, ua le mafai e i latou na i ai ona puipui lau aiatatau ou te talanoaina ai ia Tulafono nei e 3.

E momoli atu ai le faafetai tele i lenei taeao, ua mafai ona maua se avanoa lona 2, e mafai ai ona ou tautala foi i nei Tulafono ogoga ma le mafuaaga na ala ai ona tetee lou nei tagata i le Paeaiga ua tuanai. O lea lava na oo ai lava na toeitiiti lava a afaina ai, i le aso mulimuli o le Fonotaga a le Palemene na tuanai atu ona sa faatuina ai lava se lafo ina ia suesue au nei ma nisi o matou e uiga i nei Tulafono. Ia ae peitai...

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fatalai...

Tofa Hon LEATINUU WAYNE SOOIALO: O le a ou le toe oo i le tulaga lea lau afioga i le Fofoga Fatalai, o lea a ou talanoa...

Tofa Hon Lauofo Fonotoe Nuafesili Pierre Lauofo: Leai ua ou tulai atu, o lea o lea ua taoto le saunoaga a le afioga a le Palemia, tatou see ese ma ia mea, ae tatou agai tonu i le anoliu o le Tulafono ma Lafo e pei ona faatu. Ae lau afioga, se e le i tulia oe. A lea e avanoa le nofoa lea, afio mai, afio mai e tatou toe mafuta. O lau afioga na e tulai ma e savali ese ma le tatou Vaega.

Ia ae o matou, e alolofa tele i lau afioga.

FOFOGA FETALAI: Ia o lea ua maua, ia...

Tofa Hon LEATINUU WAYNE SOOIALO: Faafetai lava mo le avanoa foi ua tuuina mai.

Tofa Hon Lauofo Fonotoe Nuafesili Pierre Lauofo: Leatinuu, o le tala lena.

FOFOGA FETALAI: Lau afioga i le Sui Taitai, ia faaaauau le saunoaga a le Minisita.

Tofa Hon LEATINUU WAYNE SOOIALO: E pipii lava lou agaga i le saunoaga foi a le Sui Taitai. Tatou agai i luma. O lenei lava e matou te agai i luma, ae o lena lava e piipii pea i tulaga o mea ua tuanai. Ae masalo o le a le ou toe oo i ai, ae o le a ou fai se manatu e uiga i le Tulafono po o le Lafo foi ua toe faatuina mai.

O le mea e pito i sili ona taua ia te au, ana leai se faaletonu o le Tulafono, e tatou te le oo i le taimi lenei. E tatou te le toe aumaia i totonu ina ia toe iloilo ma toe tilotilo. E faafetai atu i le Komiti sa duesueina lenei mataupu. Ua mafai ai ona maua se finagalo e aumai ai se manatu ma se Lipoti i totonu o le Palemene, ina ia toe tilotilo le Palemene i le Lipoti ma le faatinoina o lenei Tulafono e le o ala tutusa ma tulaga foi o le Tulafono na faatino ai.

E tele foi ni tulaga ua sui ai le Tulafono, mai i le Tulafono na amata ai ona faatinoina lenei faamoemoe. O le mafuaaga lena o lea ua aumai le fautuaga mai i le Loia Sili, aemaise foi o le fautuaga a le Komiti na aumai ina ia toe tilotilo totoa le Palemene i mea o lo o faaletonu. Ana faapea lava o lelei, o le a le mea o le a lote ai fua? Tuu le Tulafono e alu leaga ua uma ona pasia. Ae peitai, o lo o i ai ia ni eseesegea, o kopi foi na i ai o lea ua ala ai ona mafua ona toe aumai.

O lea la o le a toe aumai le Tulafono, sa pasia i le Aso 15 o Tesema. O lona uiga, o lea o le a toe faafoi mai le Tulafono lea sa o tatou pasia i le Paeaiga na tea nei. E ui lava pe o le a se tetee foi a nisi o i latou sa taumafai i ai, ia ae peitai ua le mafai lava ona tuua foi se finagalo o le Faigamalo na i ai, ia ma pasia ai lava le Tulafono. O lea la ua toe maua ia le tatou avanoa, o le avanoa lelei lenei, e toe iloilo lelei i ai ia le tatou Palemene, ma toe tilotilo i tulaga e tatau ona faatino ai ia le Faamasinoga o Fanua ma Suafa. A faapea loopholes, a faapea o i ai ni faaletonu faapena, faasao. O le tulaga lea o le a i ai, o le a tatou faasaosao.

Lau afioga i le Fofoga Fatalai, e le umi foi se tala. O le mea sili o lea ua aumai le avanoa e toe faafoi mai ai le Tulafono sa tatou pasia i le Paeaiga ua tea nei. Ia a faapea o le a se finagalo o le tatou Palemene, tatou iloilo lelei ma tatou toe tilotilo i ai, leaga o lo o toa le galuega lea i i le Faamasinoga o Fanua ma Suafa. O lo o faatalitali mai foi ia i tatou, ina ia o tatou faia mea tonu ma le mea amiontonu. Aua a amiontonu le Palemene lenei, e amiontonu foi le Faamasinoga la o lo o faatalitali mai.

Ia pau lea o se faamatalaga lau afioga i le Fofoga Fatalai. Ia manuia lava fuafuaga, manuia foi lena Itu, faapena foi le taumafai atu a lenei Itu, ia Viia le Atua. Amene.

FOFOGA FETALAI: Malo, faafetai. Ia malo saunoa lau afioga i le Minisita. Ia o lea e matau atu o lea e fou mai le sa o le Minisita o Galuega Tetele ma Felauaiga.

Tofa Hon OLO FITI AFOA VAAI (Minisita o Galuega, Felauaiga ma Atinae Eseese): Ia faafetai i lau afioga i le Fofoga Fatalai. Ia sa fia maua lava sina 2 minute e avatu ai nai lagona e tusa ai foi ma le Lafo faatu a le afioga i le Tamaitai Palemia ma le tatou Malo. Ia o le a faapuupuu atu ona e faalelava foi le taimi.

Lau afioga i le Fofoga Fatalai, o le mataupu lenei e le i faigofie le matau i aiaiga ma tulaga na aliali mai i lea foi vaitau ua tuanai atu lea sa fetotoai ma tulaga le mautonu ia le tatou Palemene ma le tatou atunuu. E mafua lau afioga i le Fofoga Fatalai i sou lava lagona ona ua fesopoai ia tiute tauave ia ma le tulaga foi lea e faasiliaupule ia le tulaga na oo i ai le mataupu lea.

Lau afioga i le Fofoga Fatalai, e na o sau tuualalo, ua manino tulaga uma sa oo i ai ooooga o le mataupu lenei. Ae na o sau tuualalo lau afioga i le Fofoga Fatalai, se i silasila ifo lava i le tatou Tulafono Tumau ina ia toe tagai lelei ai i tulaga o mea ia sa aliae mai o le suiina o Tulafono i tua atu o mea sa pasia e le Palemene, se i toe tau faamalosi mai ia ma le tulaga foi faale-Tulafono e tatau ona i ai.

O le isi mataupu lau afioga i le Fofoga Fatalai ou te fia tautala i ai, o le Process. O le Process o le mea lea na tulai mai ina ia aua ne i toe tulai mai.

O le Process e amata atu i inei i le Palemene, i lona pasiaina o so o se Tulafono agai atu i le tatou Ofisa, ona oo atu loa lea i le Palemia.

Lau afioga a ou matau i le mataupu lea sa matuai ou tetee ai i le taimi lea na teuteu ai ia le Tulafono Faavae, i le fautuaina lea e le Palemia o le Ao mamalu o le Malo i tulaga la ia faapea. O lea e manino lava i i i le Vaega 60 o le Faavae, i ituaiga Tulafono ia e avatu fautua e le Palemia, pe a pasi atu i inei, ona fai lea o le fautuaga a le Palemia pe finagalo e avea le Tulafono lea ua pasia mai e le Palemene ma se Tulafono o le Palemene pe le finagalo foi i ai.

Ia o lea e faafofoga lau afioga i le Tamaitai Palemia, o lea e involve i i le Malo i le faaiuga lea a le Palemene e tau i o i le Ao o le Malo. E i ai lava lagona, e tatau lava ona tutoatasi atu le Palemene i le Process lea e agai atu i Le Ao o le Malo. Ia te au lava ia e talafeagai le fautuaina e le afioga i le Loia Sili o Le Ao o le Malo i tulaga ia. Ia te au lava ia ma lou lagona e faapena, ao le fautua e le Palemia o Le Ao o le Malo pe avea se Tulafono lea ua pasi atu e le Palemene ma se Tulafono pe leai, a o le fesili, o ai na tapenaina le Tulafono? Na tapena atu e le Faigamalo e aumai i totonu o le Palemene.

I sou la lagona lau afioga, e tatau foi ona silasila totoa i ai le tatou Malo i le toe teuteuina o le Tulafono lea aua e i ai lava le isi mea la e sau ai i tua. A le sainia e Le Ao o le Malo se Tulafono Tau Faaofi e avatu e le Palemene, ia ua saini e le Failautusi a le Kapaneta.

O le tatalo lau afioga i le Fofoga Fetalai ma le mamalu i le afioga i le Tamaitai Palemia ma le tatou Malo, tatou agai i le faatutoatasiina o le Ao o le Malo ma lana galuega. Ua tatau ona faatotoga i ni tagata faigaluega agavaa e latou te faia le Process lea ma faataunu le Process lea.

Ia o se manatu na lau afioga a le Fofoga Fetalai, tau na avatu ai se tuualalo, ia ae faafetai mo le avanoa.

FOFOGA FETALAI: Malo faafetai. Ia malo saunoa.

Afioga Hon Tapunu Niko Lee Hang (Vaimauga 3): Lau afioga i le Fofoga Fetalai...

FOFOGA FETALAI: Ia se i... ia onosai mai lava lau afioga, o lea ua faasolo tatou sui usufono e toa 3. Ia tulai mai lau afioga i le Minisita o Faatoaga, lou avanoa

Susuga Hon LAAULI LEUATEA POLATAIVAO FOSI: Faafetai ua maua le avanoa. Manatu ua malama i ulugalu ae ufitia i peau le tofa a lau afioga i le Fofoga Fetalai, aemaise foi le lafo manino a le afioga i le Taitai o le Malo. Ia na manatu lea o le a papaaveloa se lagona. E ui foi i lagona o lenei taeao ua agi i le siuamouli, ma agi faasulusulu le lai, tuleiga foi ma

saunoaga, lau afioga i le Fofoga Fetalai, e le faigofie le taeao lenei. Ua tele mataupu ogaoga ua tatou talanoaina, mai lava i le filifiliga o le Ao o le Malo, taunu mai foi le faatofalaiga a lau afioga i le Fofoga Fetalai ma ou atugaluga, ae o lea la ua o tatou taunu mai i se tasi o Tulafono e pito i sili ona taua i le Maota.

Lau afioga lea ua malamalama finagalo o sui usufono, e ala i atugaluga o le Tulafono lenei. O le Tulafono o lo o limataitaiina ai le malu o Samoa i ana measina, ana tamaliaga ma ona faasinomaga o le Tulafono o le Faamasinoga o Fanua ma Suafa. O ai la lau afioga i le Fofoga Fetalai e faia le Tulafono lea?

Lau afioga, o le Fono Faitulafono a Samoa, tatou ua i ai le taeao lenei. Peitai o lea ua saunoa le afioga i le Minisita ua ala ona tatou toe talanoaina, ona ua mamaioa ma mamaitaloa le anoliu o le Tulafono lenei. Aisea? A sese lava lona amataga, e sese foi lona taunuuga. Ae lagona le agaga faafetai ona o le tofa na ae, na fai ai le tatou Komiti Suesue. O lea na lauliliu ai le tofa a le Palemene, e fai le tulaga lea ua tatou talanoa ai. E toe lafo le mataupu i le Fono Faatonu, le Pule Faatonu latou te toe lauliliuina, ona momoli mai lea e fai i ai le tofa a le Maota i le taeao lenei.

Lau Afioga i le Fofoga Fetalai, o ananafi na fau ai le aso. Ma o le aso e fau ai taeao i le Tulafono lenei. E le o se Tulafono e tatau ona tatou tago faatumutumulima i ai, pe faapea mai, e na o nai suiga o mea sese ua lepe ua faatamala le Ofisa. O ni upu tuulafoai ia upu. Aisea? E le o se galo nimo o le galo ua sio. E sese le faautauta a i latou ua latou faia ia mea e ese, ua tuu i ai le pule a le Palemene ae fai le latou pule.

O le mea lea lau Afioga i le Fofoga Fetalai, e le faaitiitia. O le 1981, e 7 tausaga, o lauliliu le Tulafono lea a le atunuu. A o le a le mea lea na fai i pili nei e tolu? E le i taitai lava le talanoaga a Samoa e fitoitonu i ai le Tulafono lenei. E leaga foi o i latou e ana mea ia, o i latou e ona fanua, o latou e ona faasinomaga, o latou e ona suafa, o le malu lea o le atunuu. Ae o le a le mea lea na fai e le Nofoaiga lea na uma nei? Topelau, tulituliapu, faitoatasii. O lea ua saunoa Leatinuu, tasi lea Tulafono na aveese ai ia. Ona o le a? O le finau atu, finau atu ina ia malu le Tulafono. O le ala lea lau Afioga i le Fofoga Fetalai, ina ia aua nei o tatou mafaufau mama i le mea lea. E leaga o le Tulafono e malu uma ai tatou. E faapefea ona tatou omai i le Maota? O lou suafa, o lou faasinomaga, o lou talitonuga.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai, pe maua se avanoa.

Susuga Hon LAAULI LEUATEA POLATAIVAO FOSI: O le ala lea lau Afioga i le Fofoga Fetalai...

FOFOGA FETALAI: Ua maea lou taimi, se i faaafu mai le saunoaga a le Minisita.

Susuga Hon LAAULI LEUATEA POLATAIVAO FOSI: E avatu ai le lagolago ma le faamalo i lau Afioga i le Tamaitai Palemia, ona ua toe aumai le Tulafono lenei. O lau fesoasoani, matua toe review atoa. Matua aumai atoa mea e le i atoatoa i ai le mea na oo i ai suesuega a le Komiti. Aua o isi lava mea na aumai e ioe mai e tetee mai nuu, ae aumai e ese tala na fai. O le ala lea lau Afioga i le fofoga Fetalai, ua ou tulai atu ai ma le faaaloalo, faafetai ua toe maua le avanoa se i toe lauliliu le atunu i ni teuteuga e toe fai ma toe aumai i totonu se i pasia aloaia e le Palestine ona avea loa lea ma Tulafono. Manuia le faafogofaga mai a Samoa, manuia le Fono i lenei aso.

FOFOGA FETALAI: Ua malo saunoa i lau Afioga i le Minisita ma lagolagoina foi lo tatou faamoemoe. O le upu lava a le Nofoa lea na fai atu, o lea foi na finagalo malie i ai le Sui Taitai o le Itu Agai, e taitoatolu a tatou sui, ona e le toe talanoaina lenei mataupu, ua uma ona talanoaina e le Palestine.

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai, ou te le o tulai atu e fai se manatu i le Tulafono. E pau si mea lea e fia avatu ai se faafesili i le la Itu, leaga o lea e maua i le matou faalogologo atu, e pei e ese le vaega lea e saunoa i ai Afioga i Minisita, ese le lafo lea e aumai. O le lafo lea e aumai e le Afioga i le Palestina, e le toe aumaia le Tulafono i le Palestine lenei. E ave e fai e le Failautusi o le Fono ma le Ofisa o le Fono teuteuga, ona toe ave lea e faasaini Le Ao o le Malo, ae le toe aumaia i le Fono a le Palestine. Ma le agaga faaaloalo.

FOFOGA FETALAI: Ia, o lea ua manino.

Afioga Hon Tapunu Niko Lee Hang (Vaimauga 3): Lau Afioga i le Fofoga Fetalai. Ia faafetai mo le avanoa.

FOFOGA FETALAI: Ia malie lau Afioga Tapunu.

Afioga Hon Fiame Naomi Mataafa: Lau Afioga o lea o le a ou tulai atu e tali.

FOFOGA FETALAI: O lea o le a tulai atu le Palestina...

Afioga Hon Tapunu Niko Lee Hang: E laitiiti lava si au fesili lea.

FOFOGA FETALAI: Ia malie lau Afioga i le Palemia, se i tuu atu lava le avanoa.

Afioga Hon Tapunu Niko Lee Hang: Ia faafetai i lau Afioga i le Fofoga Fetalai mo le avanoa. Sa ou fia tulai lava e fesiligia le mataupu lea e pei ona lagalaga mai, a o la na saunoa manino le afioga i le Palemia, tatou talanoa i le lafo, o le de-assent ma le re-assent, a o lea ua toe foi i tua le tatou mataupu. A o lea na saunoa manino le Palemia, tatou talanoa manino i le mea lea e i le lafo. Aua le toe aumaia mea ia, o la e soifua le Atua e faamasino tonu lava mea ia tatou te finau ai, aua e le iloa po o ai e sao a o ai e sese.

Afioga Sulamanaia Fetaiai Tauiliili Tuivasa: Lau Afioga mo le faasaoina o le taimi o le Tamaitai Palemia, e na o sina mea e fia faasao i le saunoaga a le Minisita o Faatoaga. E faaeteete lava, ona o lea e alala atu le afioga ia Leaana o maua sa i ai i le Komiti. O lea e saunoa ai le Minisita sa faatopelau le faatalatalanoaina o lenei Tulafono. O lea foi na talanoa mai i le 1981 e 7 tausaga. Lea foi e faapea a sese lava le amataga e iu lava i le sese. Pe faasao atu e le i sese la amataga o lenei... o le fingalo o le Palemene lenei na gaoioi ai le Komiti. O le Tulafono foi lenei na pasia i le 2/3 o le Palemene. E le mafai e se Komiti e le mafai e ni sui toagaogao ona toe sui le tulafono. E pei o lea sa ma i ai, e le manaia la le fai mai sa topelau, e le i topelau sa soo atoa le atunuu i le faatalanoaina o lenei Tulafono. Ma lou agaga faaaloalo.

FOFOGA FETALAI: Malo faafetai. Tulai mai lau afioga i le Palemia.

Afioga Hon FIAME NAOMI MATAAAFA: E faafetai tele i lau Afioga i le fofoga Fetalai, faafetai foi i sui usufono o e na saunoa i le tatou lafo. Ua matauina lau Afioga i le Fofoga Fetalai, e pei o tama tuai ia o le maea lea sa saunoa aemaise o i latou sa i ai i le Nofoaiga talu ai. Atonu foi e talafeagai lea, ona o le tulafono sa pasia i le Nofoaiga talu ai. O lea e talanoa mai ma le malamalama i latou o e sa saunoa, aua sa nonofo ai i totonu o le Maota lenei.

Ae ou te toe foi mai lava i le mataupu autu o le lafo, ina ia mafai ona faagasolo le tatou galuega, ina ia foia le toa o lo o tulai mai i le taimi lenei i le Faamasinoga o Fanua ma Suafa ona o lape o le Tulafono. Ma e leai nisi e faia, o tatou e faia. O finagalo foi o lo o faaalia i le faagasologa maia o le Tulafono, ou te faasilasila atu ma le faaaloalo i lau Afioga i le Fofoga Fetalai, ma le mamalu o le Maota, e i ai le avanoa tatou te toe asiasi ai i le Tulafono, pe a maea atu le faagasologa le e fai nei, ae toe aumai la ni teuteuga. O teuteuga la ia e foia ai, ia le toa lea o i ai i le Faamasinoga o Fanua ma Suafa. Atonu e maua ai le avanoa lea o lo o saunoa i ai nisi o sui usufono, i mataupu foi o lo o lagalaga mai.

Lau Afioga i le fofoga Fetalai, o le a ou le toe tautala i le aano ma le feau o le Tulafono, ae tasi lava le mea ua ou maua atu i saunoaga a sui usufono, o le itu lea o le faapolokiki o a tatou faaiuga fai. Atonu e le mafai ona tatou aloese i lena tulaga, aua o le natura lena o lea ua agai i ai upufai. Ma e faaali foi fingalo o sui usufono, po o fea lava le mea e tata i ai finagalo, po o Sasae, po o Sisifo, ae fai lava le finagalo o le Palemene lenei. E pe o finagalo, la o sui ona o se agaga faapolokiki, ae ou te faamoemoe lau Afioga i le Fofoga Fetalai, o faaiuga a le Palemene e fai, e muamua taitaina i Tulafono.

O Tulafono i inei i le tatou Maota, Tulafono ua pasia e le tatou Maota, e taitaiala mo faaiuga fai a le Maota lenei, e ui pe eseese mau ma taofi, pe polokiki ae o le faamoemoe, o a ni faaiuga, tatou te savavali i luga o le Tulafono.

O le agaga lena lau Afioga i le Fofoga Fetalai, o lea na saunoa sui usufono, aumai le fautuaga a le Komiti e toe faasolomuli le Tulafono. A o le a le fautuaga a le Malo, ma le lafo na tuuina atu. Ona o le a? ona o le tulafono, aua le tauaveina le fautuaga lea. O le mafuaaga lena, aua le tauaveina ona e le talafeagai ma le Tulafono. O le feau e fia momoli atu pea i le Maota, po o fea le mea e fetalai i ai la outou tofa ma le faautaga, ae faamolemole, o tatou o tagata faitulafono, tatou savavali i luga o le Tulafono. E tele faaiuga e ono fesiligia ai le Maota lenei, fia nofoaiga ua ou saofai ai foi au e fai ma sui o le itumalo, ae vaai lava ma le faanoanoa i le tatou tata ese ma le tulafono. O tulafono i totonu o le Maota lenei, ma tulafono lautele o lo o pulea ai lo tatou atunuu. O le taumafaiga lea ua faataatia atu i le lafo i lenei taeao, e tatou te savavali pea, ma tatou tata i le moa o le ala i le tulafono ua saunia tatou te galulue ai. Ou te faafetai atu i sui usufono ua saunoa, ua matauina le lagolago i le lafo a le Malo.

Lau afioga i le Fofoga Fetalai, aumaia le fesili. Ma le faaaloalo.

Na faamaonia le lafo.

TULAFONO TAU FAAOFI O TEUTEUGA O LE TULAFONO O LAFOGA O TUPE MAUA 2021 – iloiloga auiliili.

FOFOGA FETALAI: Mo le silafia e le Palemene, o le Tulafono Tau Faaofi lenei sa faia lona faitauga faalua i le aso 21 Ianuari 2022 ma toe pasia ai le lafo mo se taimi faaopoopo o iloiloga a le Komiti i le aso 31 Me 2022.

E tusa ai ma le Tulafono Tumau 107 (1), e ao ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea mo le Iloiloga Auiliili.

Ou te tapa lau Afioga i le Taitaifono o le Komiti o le Vaega Tau i le Tamaoaiga, lau Afioga Niuava Eti L Malolo.

Afioga NIUAVA ETI L. MALOLO (Taitaifono o le Komiti o le Vaega Tau le Tamaoaiga): Lau Afioga i le Fofoga Fetralai ou te tulai atu e faatu le lafo, *Ina ia faamaonia e le Fono Aoao le Lipoti a le Komiti o lo o fautuaina ai, ina faagasolo le Tulafono Tau Faaofi o Teuteuga o le Tulafono o Lafoga o Tupe Maua 2021 faatasi ma le Faasaoga.*

Faaluaina e le sui usufono mo Falealili 2 ma le sui usufono mo Sagaga 4.

Na faamaonia le lafo.

FOFOGA FETALAI: E tusa ai ma Tulafono Tumau e 104, e amata le iloiloga auiliili i le Fuaiupu e 2.

FUAIUPU 2: Ua teutueina le fuaiupu 2.

Faamaonia.

FUAIUPU 3: Ua teutueina le fuaiupu 61.

Faamaonia.

FUAIUPU 4: Ua teutueina le 93.

Faamaonia.

FUAIUPU 5: Ua teutueina le fuaiupu 93A.

Faamaonia.

FUAIUPU 6: Ua teutueina le Faamatalaga 2.

Faamaonia.

FUAIUPU 7: Aiaiga tau soloaiga.

Faamaonia.

FUAIUPU 1 MA LE IGOA:

FUAIUPU: *Igoa puupuu ma le amataga*
IGOA: *Tulafono o Teuteuga o le Tulafono o Lafoga o Tûpe Maua 2021.*

FOFOGA FETALAI: O lo o i ai faasaoga a le Komiti i le Fuaiupu 1. Tulai mai lau Afioga i le Taitaifono.

Afioga NIUAVA ETI L. MALOLO: Lau Afioga i le Fofoga Fetalai, ou te faatu le Faasaoga i le Fuaiupu 1 ma le Igoa o le Tulafono e faapea:

“FAASAOGA:

Ia aveese le fuainumera “2021” ma suia i le fuainumera “2022” ina ia faitauina ai le Igoa o le Tulafono e faapea,

“TULAFONO O TEUTEUGA O LE TULAFONO O LAFOGA O TUPE MAUA 2022”

Faamaonia le Faasaoga.

Na faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Tulafono o Teuteuga o le Tulafono o Lafoga o Tupe Maua 2022 faatasi ma le Faasaoga.

LAFO MO LE FAATAATIAESE O TULAFONO TUMAU

Afioga Hon FIAME NAOMI MATAAFA: Lau Afioga i le Fofoga Fetalai, ou te faatu le lafo, *Ina ia faataatiae Tulafono Tumau 108(4), ina ia avanoa ai le faiatuga faatolu o le Tulafono Tau Faaofi sa iloiloina auiliili i le aso Fono lenei.*

Faaluaina e le Sui Palemia ma le Minisita o Faatoaga ma Faiga Faiva.

Na faamaonia le lafo.

TULAFONO TAU FAAOFI O TEUTEUGA O LE TULAFONO O LAFOGA O TUPE MAUA 2022 – faitauga faatolu

FOFOGA FETALAI: Ou te tapa lau Afioga i le Minisita o Tiute ma Tupe Maua mo le lafo.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2022 i lona faitauga faatolu.*

Faaluaina e le Minisita o Faatoaga ma Faiga Faiva ma le sui usufono tamaitai mo Anoamaa 2.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

FOFOGA FETALAI: O lea ua tatou taunu mai i le faaiuga o le tatou galuega sa faatulaga mo lenei aso. E momoli atu ai le faafetai ma le faamalo i a outou afioga. Ia tatou faafetaia foi le tapuaiga a le tatou atunuu, ua manuia ai lenei aso ma le tatou Fonotaga. Ae tatou te le i tolopo, ou te tatalo atu i le sui usufono mo Anoamaa 1 mo se tatalo e faaiu ai le tatou Fono.

Na tolopo Taualumaga a le Fono Aoao Faitulafono i le itula e 12:00 i le aoauli seja aulia le Aso Lua, 18 Oketopa 2022 i le itula e 9:30 i le taeao.